

清  
靜  
經

太上老君說常清靜經

老君曰：大道無形。生育天地。大道無情。運行日月。大道無名。長養萬物。吾不知其名。強名曰道。夫道者。有清有濁。有動有靜。天清地濁。生萬物。清者濁之源。動者靜之基。人能常清靜。天地悉皆歸。夫人神好清。而心擾之。人心好靜。而慾牽之。常能遣其慾。而心自靜。澄其心而神自清。自然六慾不生。三毒消滅。所以不能者。爲心未澄。慾未遣也。能遣之者。內觀其心。心無其心。外觀其形。形無其形。遠觀其物。物無其物。三者既悟。唯見於空。觀空亦空。空無所空。所空既無。無亦無。無既無。湛然常寂。寂無所寂。慾豈能生。慾既不生。即是真靜。真常應物。真常得性。常應常靜。常清靜矣。如此清靜。漸入真道。既入真道。名爲得道。雖名

得道。實無所得。爲化衆生。名爲得道。能悟之者。可傳聖道。老君曰：上士無爭。下士好爭。上德不德。下德執德。執著之者。不明道德。衆生所以不得真道者。爲有妄心。既有妄心。即驚其神。既驚其神。即着萬物。既着萬物。即生貪求。既生貪求。即是煩惱。煩惱妄想。憂苦身心。便遭濁辱。流浪生死。常沉苦海。永失真道。真常之道。悟者自得。得悟道者。常清靜矣。仙人葛翁曰。吾得真道。曾誦此經萬遍。此經是天人所習。不傳下士。吾昔受之於東華帝君。東華帝君受之於金闕帝君。金闕帝君受之於西王母。西王母皆皆口口相傳。不記文字。吾今於世。書而錄之。上士悟之。昇爲天官。中士修之。南宮列仙。下士得之。在世長年。遊行三界。昇入金門。

左玄真人曰。學道之士。持誦此經者。即得十天善神擁護其身。然後玉符保神。金液鍊形。形神俱妙。與道合真。正一真人曰。人家有此經。悟解之者。災障不干。衆聖護門。神昇上界。朝拜高真。功滿德就。相感帝君。誦持不退。身騰紫雲。太上說常。清靜經終。

此經廣言天地人之道理。亦是修心養性。明心見性之玉訣。修真進道之路徑。誦之無間。災難離身。能悟能行。登真證道可期矣。